



**NOGOMETNI/FUDBALSKI SAVEZ
BOSNE I HERCEGOVINE**

P R A V I L N I K
o registraciji, statusu i transferu igrača

Sarajevo, Juni/Lipanj 2012.

Na osnovu Odluke FIFA Komiteta za hitnost od 12.04.2011. god. i člana 35. Statuta Nogometnog /Fudbalskog Saveza Bosne i Hercegovine, a u skladu sa FIFA Pravilnikom o statusu i transferu igrača od 07. 06. 2010. godine, Komitet za normalizaciju Nogometnog/Fudbalskog saveza BiH na sjednici održanoj dana 21.06.2012. godine, donio je

P R A V I L N I K

o registraciji, statusu i transferu igrača

I OPŠTE ODREDBE

Član 1

Ovim Pravilnikom regulišu se pitanja koja se odnose: na registraciju klubova i igrača, obaveznost upotrebe COMET informacionog sistema kod registracije klubova i igrača, status i kategoriju igrača, postupak za promjenu kluba, registracione periode, sticanje prava nastupa igrača na zvaničnim utakmicama, prijave za registraciju, pasoš igrača, izdavanje međunarodnih certifikata o transferu, FIFA TMS sistem (sistem praćenja transfera), postupak registracije maloljetnih igrača iz inostranstva, ustupanje (posudba) igrača, poštivanje ugovora, prekid ugovora iz opravdanih razloga, prekid ugovora iz opravdanih sportskih razloga, zabrana prekida ugovora u toku sezone, posljedice prekida ugovora bez opravdanog razloga, naknade za treniranje, zaštita maloljetnih igrača, mehanizam solidarnosti, odgovornost pri plaćanju naknade za treniranje, principe izračunavanja naknade za treniranje, pitanja koja se odnose na mali nogomet/fudbal i pitanja koja se odnose na ženski nogomet/fudbal, rješavanje sporova vezanih za registracije, ugovore i naknade za treniranje, zaštićene igračice i druga statusna pitanja igrača.

Član 2

Nogometni/Fudbalski Savez Bosne i Hercegovine (u daljem tekstu: NS/FS BiH), u smislu ovog Pravilnika, obuhvata sve saveze i klubove registrovane u BiH.

Član 3

Odredbe ovog Pravilnika obavezne su za sve saveze, klubove i igrače u Bosni i Hercegovini.

II REGISTRACIJA KLUBOVA

Član 4

Članovi NS/FS BiH donose odluku o nadležnim savezima za registraciju klubova i igrača, a verifikuje ih Izvršni organ NS/FS BiH.

Uslovi koji moraju biti ispunjeni da bi savez mogao imati registracionu nadležnost propisani su Pravilnikom o uslovima koje moraju ispunjavati registracioni savezi za vršenje registracija klubova i igrača na teritoriji NS/FS BiH.

Član 5

Prijava za registraciju klubova podnosi se savezu nadležnom za registraciju.
Da bi klub postao član NS/FS BiH, potrebno je da ispunjava slijedeće uvjete:

1. da nadležnom savezu podnese molbu za registraciju i prijem u članstvo, u kojoj se obavezuje da će raditi prema Statutu, pravilnicima i odlukama NS/FS BiH i njegovih organa i organizacija;
2. da podnese rješenje nadležnog organa da mu je odobren rad i da je registriran kod nadležnog suda, odnosno nadležnog organa;
3. da podnese izvode iz zapisnika sa osnivačke skupštine sa spiskom članova uprave;
4. da priloži prepis statuta i Rješenje nadležnog organa o licu za predstavljanje i zastupanje kluba;
5. da uplati upisninu i članarinu, čiju visinu određuje nadležni savez za registraciju;
6. da registrira najmanje 20 igrača za klub velikog nogometa/fudbala, ili najmanje 10 igrača za klub malog nogometa/fudbala, odnosno najmanje 15 igrača za klub ženskog nogometa/fudbala;
7. da ima sopstveno ili ugovorom obezbijeđeno igralište.

Nadležni organ za registraciju neće registrirati klub ukoliko ne ispunjava uslove iz predhodnog stava, ako statut kluba nije u skladu sa Statutom NS/FS BiH i statutima njegovih članica, kao i ukoliko prijavi ime kluba iz istog mjesta koji je već registrovan pod tim imenom.

Nadležni savez za registraciju, putem organa kojeg ovlasti, odlučuje o predmetu registracije kluba.

Klub može promijeniti ime kluba najkasnije 30 (trideset) dana prije početka takmičenja/ prvenstva. Klubovi koji su promijenili naziv kluba, potrebno je da prilože sledeće dokaze:

- 1) Podnijeti zahtjev nadležnom registracionom savezu, sve kao u tački 1. stava 1. ovoga člana
- 2) Dokaz opisan na način kao u tački 2 stava 1. ovoga člana
- 3) Dokaz – zapisnik sa Skupštine na kojoj je usvojena promjena imena kluba
- 4) Dokaz kopija Statuta sa promijenjenim imenom kluba
- 5) Dokaz o uplatiti upisnine i članarine vezano za promjenu imena kluba

Odluka o promjeni imena kluba obavezno se objavljuje u Službenom glasniku.

Klubovi se mogu spajati pod uslovom da su iz istog Područnog/Kantonalnog/Županijskog fudbalskog saveza, kao i u skladu sa ovim Pravilnikom odnosno Pravilnikom o nogometnim / fudbalskim takmičenjima. Ako jedan od klubova u spajanju zadržava ime, mora se objaviti prestanak rada drugoga kluba, a u slučaju da se spajanjem dva kluba uzima novo ime zajedničkog kluba, dužni su prijaviti registraciju novoga kluba i prestanak rada klubova u spajanju.

Klub za vrijeme koje je određeno Ugovorom o sponzorstvu uz ime kluba može dodati i ime sponzora. U tom slučaju ime sponzora uz ime kluba prijaviće se nadležnom takmičarskom organu, a dopuna imena kluba neće se posebno registrovati prema odredbama ovoga Pravilnika.

Član 6

Klub postaje član NS/FS BiH kada ga primi nadležni organ za registraciju i odluku o prijemu objavi u Službenom glasniku NS/FS BiH.

Nadležni organ za registraciju je obavezan da objavi odluku o registraciji kluba u Službenom glasniku u roku od osam dana po njegovom prijemu.

Po izvršenoj registraciji klub ima pravo da se uključi u odgovarajuće prvo naredno prvenstveno takmičenje.

Klub koji se ne uključi u takmičenje ne posjeduje statusna prava koja proizlaze iz članstva.

Član 7

Klub se može istovremeno registrirati za mali i veliki nogomet/fudbal, odnosno ženski nogomet/fudbal, ako ispuni slijedeće uvjete:

1. da u molbi za registraciju i prijem u članstvo navede da se registrira za mali i veliki, odnosno ženski nogomet/fudbal;
2. da u statutu reguliše članstvo velikog i malog, odnosno ženskog nogometa/fudbala;
3. da registrira najmanje 20 igrača za veliki i 10 igrača za mali nogomet/fudbal, odnosno 15 igrača za žensko nogomet/fudbal;
4. da uplati članarinu i upisninu za klubove koje registruje i
5. da ima sopstveno ili ugovorom obezbijedeno igralište za mali i veliki nogomet/fudbal.

Odluku o registraciji, u smislu ovog člana donose isti organi, na način i prema postupku iz ovog Pravilnika.

Član 8

Klub prestaje da bude član NS/FS BiH ili mu prava iz članstva miruju, odlukom o brisanju iz članstva, odnosno odlukom o zamrzavanju statusnih prava.

Nadležni organ za registraciju donosi odluku iz predhodnog člana, koju treba da potvrdi izvršni organ nadležnog saveza, a odluka se objavljuje u Službenom glasniku NS/FS BiH.

Član 9

Klubovi su dužni sve registrovane igrače osigurati od povreda, trajnog invaliditeta i smrti, ako su isti nastali prilikom treniranja, takmičenja, putovanja na takmičenje i putovanja na treninge.

Za igrače profesionalce, pored prednje navedenog osiguranja, klub je dužan da uplaćuje doprinose, koji se plaćaju na plate iz radnog odnosa, posebno doprinose za penziona - invalidsko osiguranje, a kad omogući pravni sistem države BiH odnosno entiteta, klub i igrač mogu se sporazumjeti da se ovo pitanje riješi ugovorom.

Osim ugovora o radu, klub i igrač profesionalac mogu zaključiti i poseban ugovor o profesionalnom angažmanu.

Ugovorom o profesionalnom angažmanu klub i igrač profesionalac uređuju pitanja koja nisu regulisana ugovorom o radu (naknade za zaključivanje ugovora, premije i dr.).

Verifikaciju ugovora o profesionalnom angažmanu igrača klubova Premijer lige vrši Komisija za verifikaciju NS/FS BiH, a ostale ugovore verifikuju nadležne komisije entitetskih saveza, koji su obavezni primjerak svih profesionalnih ugovora dostaviti u Sekretarijat NS/FS BiH.

Član 10

Ako klub ne uplaćuje doprinose za penziona-invalidsko osiguranje igrača sa profesionalnim ugovorom, ili ne osigura igrača za slučajeve povreda, za period više od tri mjeseca, to je opravdani razlog za prekid ugovora.

III REGISTRACIJA IGRAČA

Član 11

Igrač može biti registrovan nakon navršenih 7 godina života.
Registracija za igrača predstavlja licencu za igranje nogometa/fudbala.

1 Organ za registraciju igrača

Član 12

Registraciju igrača i klubova vrši nadležni registracioni savez, na čijoj teritoriji se nalazi klub za koji se igrač registrira.

Nadležni registracioni savez određuje koji će organ vršiti registraciju igrača na njegovoj teritoriji.

Nadležni organ za registraciju obavezan je voditi registracije klubova i igrača putem COMET informacionog sistema.

Član 13

Nadležni organ za registraciju igrača donosi odluke po zahtjevu za registraciju igrača.

O zahtjevu za registraciju mora se odlučiti najkasnije u roku od osam dana od dana podnošenja zahtjeva.

U izuzetnim slučajevima, ako su svi uslovi za registraciju ispunjeni, registraciju može izvršiti registracioni organ, bez održavanja sjednice.

2 Dokumenti za registraciju igrača

Član 14

U cilju provođenja registracije igrača, klub je dužan da dostavi uredan predmet registracije koji sadrži:

1. Za igrača koji se registruje prvi put:

- a) zahtjev kluba sa popisom dokumenata koji se prilažu za registraciju;
- b) dva primjerka prijave za registraciju sa fotografijama, uz potpis igrača (u slučaju maloljetnog igrača obavezan je i potpis jednog od roditelja ili staratelja) i predstavnika kluba, ovjerenu pečatom kluba, od kojih je po jedna za klub i registracioni savez;
- c) obrazac legitimacije sa fotografijom i upisanim ljekarskim pregledom;
- d) izvod iz matične knjige rođenih, ili lična karta;
- e) Izjavu igrača (ili staratelja) da nije bio registrovan odnosno preregistrovan za drugi klub u zemlji ili inostranstvu. Ukoliko se radi o igraču stranom državljaninu ili igraču koji je imao prebivalište na teritoriji druge države, registracioni savez je takvu izjavu dužan provjeriti putem Generalnog sekretarijata NS/FS BiH.
- f) potvrda o izvršenoj uplati takse za registraciju i
- g) četiri primjerka ugovora, ili aneksa ugovora ukoliko su zaključeni.

U COMET sistem se obavezno unose dokumenti iz tački b), d) i g).

2. Za igrača koji prelazi iz kluba u klub:

- a) zahtjev kluba sa popisom dokumenata koji se prilažu za registraciju;
- b) dva primjerka prijave za registraciju sa fotografijama, uz potpis igrača i predstavnika kluba, ovjerenu pečatom kluba, od kojih je jedan klubu i registracionom savezu;
- c) ispisnicu od dosadašnjeg kluba, ili dokaz da je igrač istu tražio od kluba u ljetnom registracionom periodu;
- d) brisovnicu, ukoliko igrač mijenja teritoriju saveza nadležnog za registraciju igrača, ili dokaz da je igrač istu tražio od nadležnog organa i da ispunjava uslove za promjenu kluba;
- e) dokaz o raskidu ugovora;
- f) sportsku legitimaciju;
- g) dokaz da su ispunjeni uslovi iz ovog Pravilnika, ukoliko se koriste registracioni periodi, u skladu sa ovim Pravilnikom.
- h) certifikat nadležnog nacionalnog saveza, ukoliko je riječ o igraču koji dolazi iz inostranog kluba;
- i) četiri primjerka ugovora ili aneksa ugovora, ukoliko su zaključeni;
- j) pasoš igrača za igrače starije od 12 godina;
- k) dokaz o uplati taksi za objavu registracije.

U COMET sistem se obavezno unose dokumenti iz tački b), c) , h) i i).

3. Za igrača koji se ustupa:

- a) zahtjev kluba za registraciju igrača sa popisom dokumenata koji su prilažu za registraciju;
- b) dva primjerka prijave za registraciju, ovjerenu pečatom kluba, sa nalijepljenim fotografijama igrača, uz potpis igrača i predstavnika kluba;
- c) pet primjeraka sporazuma klubova, u kojima je navedeno kojem se klubu igrač ustupa i na koji period, potpisan od predstavnika zainteresovanih klubova, igrača i predstavnika saveza za registraciju;
- d) certifikat za igrače koji se ustupaju od klubova iz inostranstva;
- e) potvrda o uplaćenju taksi za objavu sporazuma o ustupanju.

U COMET sistem se obavezno unose dokumenti iz tački b), c) i d).

Član 15

Igrač može biti registrovan za klub kao profesionalac ili amater.

Samo registrovani igrači imaju pravo učešća u organizovanom nogometu/fudbalu.

Činom registracije igrač je primio obavezu i saglasan je da da će se pridržavati statuta i akata kluba, propisa NS/FS BiH, FIFA-e i UEFA-e.

Član 16

U toku takmičarske godine, a u skladu sa odredbama ovog Pravilnika, igrač može biti registrovan maksimalno za tri kluba. U tom periodu igrač ima pravo nastupa za dva kluba.

3 Obrasci za registraciju

Član 17

Sadržaj teksta obrazaca prijave za registraciju, ispisnice, brisovnice, pasoša igrača, abecedne i matične knjige, okvirnih obrazaca ugovora, sporazuma o ustupanju, sporazumnih raskida ugovora, sportske legitimacije i druge obrasce u vezi sa registracijom igrača, usvaja Izvršni odbor NS/FS BiH.

4 Prijava za registraciju

Član 18

Prijava za registraciju sadrži slijedeće podatke: prezime, očevo ime i ime igrača, datum i mjesto rođenja, klub kojem pristupa sa naznakom veliki nogomet/fudbal – mali nogomet/fudbal, datum potpisa prijave, jedinstveni matični broj i dosadašnje članstvo.

Igrač je dužan pružiti tačne podatke iz prijave i to potvrditi potpisom.

Predstavnik kluba dužan je u prijavi za registraciju navesti tačne podatke i potpisom i pečatom kluba potvrditi da je igrač svojeručno i određenog dana potpisao prijavu za registraciju, odnosno ovjeriti tačnost podataka.

Za pružanje netačnih podataka igrač i klub, ukoliko se utvrdi da je za njih znao ili je mogao znati, snose odgovornost po odredbama Disciplinskog pravilnika NS/FS BiH, a u odnosu na registraciju postupa se po odredbama ovog Pravilnika.

Član 19

Igrač ne može odustati od prijave za registraciju, niti potpisati novu prijavu za drugi klub, osim na način predviđen ovim Pravilnikom.

Izuzetno od odredbe iz prethodnog stava, ako klub za koji je igrač potpisao prijavu ne podnese dokumentaciju za registraciju u roku od osam dana od dana potpisa prijave, igrač koji želi da promijeni klub može potpisati prijavu za novi klub, ukoliko ne postoje smetnje predviđene ovim Pravilnikom.

5 Ispisnica

Član 20

Za prelazak igrača u drugi klub, pored ostalog što je predviđeno ovim Pravilnikom, potrebna je ispisnica.

Ispisnicu daje klub igraču, a sadrži slijedeće podatke:

- a) porodično i rođeno ime igrača i rođeno ime oca;
- b) datum i mjesto rođenja;
- c) jedinstven matični broj;
- d) datum posljednje izvršene registracije i pravo nastupa;
- e) ime kluba iz kojeg je došao i dosadašnji status;
- f) eventualna kazna ili suspenzija od strane nogometnog/fudbalskog organa i vrijeme njihovog trajanja;
- g) datum raskida ugovora;
- h) broj javnih opomena registriranih u zapisnicima prvenstvenih i kup utakmica u toku takmičarske godine - sezone u kojoj se izdaje ispisnica;
- i) i eventualno druge primjedbe, ako je klub evidentirao;

U ispisnici se obavezno navodi napomena da li klub traži naknadu za treniranje igrača.

Član 21

Registrovani igrač koji želi da promijeni klub, može zatražiti ispisnicu koju mu je klub dužan izdati ako su ispunjeni uvjeti propisani ovim Pravilnikom.

Klubu se upućuje pismeni zahtjev uz pismenu ovjeru kluba o prijemu takvog zahtjeva, ili se on šalje preporučeno poštom kada se radi o registracionom periodu.

Ispisnica važi do 30 dana od posljednjeg dana registracionog perioda u kojem je izdata, odnosno najviše 60 dana od dana izdavanja.

Registracija igrača za drugi klub ne može se izvršiti bez ispisnice, izuzev u slučajevima koji su posebno predviđeni ovim Pravilnikom.

6 Sportska legitimacija

Član 22

Svaki registrirani igrač ima legitimaciju koju izdaje nadležni organ za registraciju.

Ako igrač mijenja klub, predhodni klub je dužan da mu preda legitimaciju.

Ako igrač ne dobije legitimaciju, onda će se na zahtjev kluba za koji se registruje izdati duplikat legitimacije, pod istim brojem koji je imao ranije, ako igrač ispunjava uslove za promjenu kluba.

Ako se legitimacija izgubi ili postane neupotrebijiva, klub je dužan da pribavi duplikat legitimacije. Duplikat će imati broj izgubljene – neupotrebijive legitimacije.

Nadležni organ za registraciju dužan je objaviti izdavanje duplikata legitimacije u Službenom glasniku NS/FS BiH.

Igrači koji igraju u klubovima na teritoriji NS/FS BiH, obavezni su na utakmicama nastupiti sa sportskim legitimacijama NS/FS BiH.

Kada igrač napušta klub, kopija sportske legitimacije obavezno ostaje u dokumentaciji registracionog saveza.

7 Brisovnica

Član 23

U slučaju prelaska igrača u klub koji se nalazi na teritoriji drugog registracionog saveza, igrač je dužan da pismeno traži potvrdu o brisanju iz evidencije registriranih igrača.

Nadležni organ za registraciju je dužan da odmah izda potvrdu o brisanju ili obavijest da li postoji neka smetnja za registraciju igrača za novi klub, u koju unosi podatak pod kojim brojem je evidentirana sportska legitimacija za koju se traži brisovnica.

Uz zahtjev se prilaže ispisnica, ili dokaz da je ista tražena, ili dokaz da je ugovor istekao, ili da je raskinut.

Kod izdavanja brisovnice, nadležni organ za registraciju je dužan izvršiti provjeru tačnosti i potpunosti podataka navedenih u ispisnici, a ukoliko to nije slučaj, mora od kluba zatražiti da istu tačno i precizno popuni. Također, ukoliko je igrač pod suspenzijom, podaci o istoj moraju biti navedeni i u brisovnici u rubrici „Primjedbe“.

Brisovnica važi do 30 dana od posljednjeg dana registracionog perioda u kojem je izdata, odnosno najviše 60 dana od dana izdavanja.

Član 24

Smatrat će se da je igrač brisan iz evidencije i da ne postoji nikakva smetnja za registraciju za novi klub, iako nema brisovnice, ako je igrač podnio zahtjev za izdavanje potvrde o brisanju u registracionom periodu i za to ima dokaze, pod uvjetom da je uz zahtjev priložio ispisnicu ili zahtjev za ispisnicu, bez obzira što mu organ nadležan za registraciju nije izdao brisovnicu i pod uslovom da su ispunjeni drugi uslovi za registraciju za novi klub.

Registracija igrača je nepravilno izvršena ako je izvršena bez potvrde o brisanju, a nije postupljeno u skladu sa ovim članom, ili postoje druge smetnje za pravilnu registraciju u smislu ovog Pravilnika.

Član 25

Brisanje iz evidencije registriranih igrača saveza vrši organ nadležan za registraciju na zahtjev igrača, uz priloženu ispisnicu ili dokaz da je istu igrač pismeno tražio od dosadašnjeg kluba i dokaz da mu je ugovor istekao, odnosno raskinut.

8 Pasoš igrača

Član 26

Pasoš igrača sadrži: ime i prezime igrača, datum i mjesto rođenja, državljanstvo, kategoriju kluba, datum prve i svih slijedećih registracija, status igrača, dodatni podaci (trajanje profesionalnih ugovora i dr.), broj prijave za registraciju, potpis i pečat predstavnika registracionog saveza.

Pasoš igrača izdaje registracioni savez sa čijeg područja igrač prelazi u novi klub, i obavezno sadrži informacije o svim klubovima za koje je igrač bio registrovan.

Kopija pasoša ostaje u arhivi nadležnog saveza.

Član 27

Svaki registrovani igrač od navršene 12. godine života, pored ostalih dokumenata, predviđenih ovim Pravilnikom, mora imati i pasoš igrača.

9 Pravo na promjenu kluba

Član 28

Igrači mogu promijeniti klub u ljetnom i zimskom registracionom periodu

Naknada za treniranje igrača ili druge finansijske obaveze igrača prema klubu ne mogu biti smetnja igraču za promjenu kluba, a sporna pitanja u vezi sa izvršavanjem tih obaveza rješavaju se u redovnom postupku, predviđenom ovim Pravilnikom.

Ustupanje igrača ne smatra se promjenom kluba u smislu stava 1. ovog člana, ali se primjenjuju odredbe o kompenzaciji za treniranje i mehanizmu solidarnosti.

Član 29

Igrač profesionalac čiji je ugovor istekao prije završetka registracionog perioda može biti registrovan izvan registracionog perioda.

Igrač amater se može registrovati i poslije završetka registracionog perioda, i to najkasnije 30 dana od dana isteka istog, i to na osnovu ispisnice ili brisovnice, ili dokaza da je istu tražio unutar registracionog perioda.

Broj igrača koji mogu biti registrovani van registracionog perioda biće definisan i Pravilnikom o relevantnom takmičenju.

10 Ustupanje igrača

Član 30

Ustupanje igrača ne smatra se promjenom kluba i vrši se u skladu sa odredbama ovog Pravilnika, s tim da važe odredbe o kompenzaciji za treniranje i mehanizmu solidarnosti.

Član 31

Igrač može biti ustupljen drugom klubu na osnovu pismenog sporazuma između igrača i odnosnih klubova.

Klub koji je prihvatio igrača na osnovu ustupanja ne može vršiti transfer igrača bez pismenog ovlaštenja kluba koji je ustupio igrača i samog igrača.

Član 32

Ustupanje igrača vrši se na period od najmanje šest, a najviše dvanaest mjeseci, uz mogućnost obnove ugovora. Ukoliko sporazum o ustupanju ističe u vrijeme trajanja prelaznog roka, smatra se da je takav sporazum istekao prvog dana prelaznog roka.

Minimalni period ustupanja igrača je vrijeme između dva registraciona perioda.

U toku takmičarske sezone klub može po osnovu ustupanja registrovati najviše četiri igrača, s tim što najviše tri mogu nastupati na jednoj utakmici.

Član 33

O ustupanju igrača zaključuje se pismeni sporazum između klubova i igrača, u nadležnom savezu čiji je član klub koji ustupa igrača.

Sporazum potpisuju predstavnici zainteresovanih klubova, igrač i ovlašteno lice nadležnog registracionog saveza.

Ugovor se zaključuje u pet primjeraka.

Član 34

Sporazum kojim se igrači ustupaju klubovima Premijer lige verifikuju se u NS/FS BiH i objavljuju se u Službenom glasniku NS/FS BiH, a sporazum o ustupanju ostalih igrača verifikuju se u entitetskim savezima i objavljuju se u službenim glasnicima entitetskih saveza.

Član 35

Sporazum o ustupanju igrača može biti raskinut uz saglasnost klubova i igrača u registracionom periodu.

Sporazum o raskidu sporazuma o ustupanju se objavljuje u Službenom glasniku NS/FS BiH za igrače klubova Premijer lige, a u službenim glasnicima entitetskih saveza za ostale igrače.

Član 36

Ustupljeni igrač u smislu ovog Pravilnika postaje na određeno vrijeme član kluba kome je ustupljen i njegovo članstvo prestaje istekom roka na koji je ustupljen ili

raskidom roka o ustupanju, a igrač bez ponovne registracije ima pravo nastupa za klub koji ga je ustupio, što se upisuje u legitimaciju igrača.

Član 37

Ustupanje igrača vrši se isključivo u registracionom periodu.

Član 38

Ustupanje igrača se može vršiti pod slijedećim uslovima:

- Kod međunarodnih transfera moguće je ustupanje isključivo profesionalnih igrača
- Klubovi Premijer i Prvih liga mogu ustupati igrače sa amaterskim ili profesionalnim ugovorom
- Klubovi svih ostalih rangova takmičenja mogu ustupati samo igrače koji imaju ugovor

Član 39

Sporazum o ustupanju igrača ne može se raskinuti prije protoka roka od šest mjeseci, računajući od dana potpisanog sporazuma.

11 Registracioni periodi

Član 40

Datume trajanja registracionih perioda utvrđuje Izvršni odbor NS/FS BiH, s tim što ljetni registracioni period počinje nakon završetka sezone i završava prije početka nove sezone. Ovaj registracioni period ne može biti duži od 12 (dvanaest) sedmica.

Zimski registracioni period će biti u sredini sezone i ne može prelaziti 4 (četiri) sedmice, a završava prije početka proljetnog dijela takmičenja.

Dva registraciona perioda za sezonu će biti unesena u FIFA TMS Sistem najmanje 12 mjeseci prije nego što stupe na snagu.

Član 41

Registracija igrača vrši se u registracionim periodima.

Izuzetno, izvan registracionog perioda, može se registrovati profesionalni igrač ukoliko mu je ugovor istekao ili je raskinut prije završetka registracionog perioda, kao i igrač amater kojem je istekao amaterski ugovor sa domaćim ili inostranim klubom prije završetka registracionog perioda, ili je igrač amater bez ugovora dobio ispisnicu kluba prije završetka registracionog perioda.

12 Odustajanje od promjene kluba

Član 42

Igrač koji je dobio ispisnicu od kluba, pa uz suglasnost kluba za koji je potpisao prijavu odustane od prijave prije nego što je registracija izvršena, može se u registracionom periodu vratiti u klub za koji je nastupio do tada i steći pravo nastupa po predhodnoj registraciji.

Za provođenje ove registracije klub dostavlja legitimaciju, pismenu izjavu igrača kojom potvrđuje da odustaje od prijave za drugi klub i pismenu potvrdu novog kluba za koji je igrač potpisao prijavu, da je saglasan sa izjavom igrača.

Također, igrač koji je otišao u inostranstvo, i za kojeg je izdat međunarodni certifikat o transferu (ITC) u korist druge asocijacije, a klub u inostranstvu u međuvremenu odustane od njegove registracije, može ponovo biti registrovan za klub u BiH, pod uslovom da je dostavio dokaz o tome da nije registrovan u inostranstvu, i da ispunjava uslove iz čl. 44 ovog Pravilnika.

Ukoliko je igrač dobio ispisnicu i brisan je iz evidencije registriranih igrača, pa odustane od namjere da se prijavi za drugi klub, može se vratiti u prethodni klub, a ima pravo nastupa po prethodnoj registraciji, pod uslovom da je savez koji je izdao brisovnicu poništio brisanje igrača u toku registracionog perioda.

13 Registracija bez ispisnice i brisovnice

Član 43

Registracija igrača koji je u registracionom periodu stekao uslove za promjenu kluba prema odredbama ovog Pravilnika, a nije dobio ispisnicu i brisovnicu, biće izvršena bez ispisnice, odnosno brisovnice, uz podnošenje ostalih dokumenata predviđenih ovim Pravilnikom, pod uslovom da novi klub umjesto ispisnice dostavi kopiju zahtjeva kojim je igrač tražio ispisnicu, sa dokazom da je zahtjev dostavljen klubu, a ukoliko mijenja teritoriju saveza, kopiju zahtjeva sa dokazom da je tražio brisovnicu.

Svi profesionalni igrači klubova koji su odustali od takmičenja u bilo koje vrijeme mogu biti registrovani za drugi klub najkasnije 30 dana prije odigravanja rasporedom utvrđene posljednje prvenstvene utakmice. Igrači amateri se mogu registrovati samo narednom registracionom periodu.

Član 44

Za registraciju igrača koji se registruju po osnovu ustupanja, ispisnica i brisovnica nisu potrebne, a za igrače koji su dobili raskid profesionalnog ugovora, ili je profesionalni ugovor istekao, nije potrebna ispisnica.

14 Zaštita maloljetnih igrača

Član 45

Ukoliko se radi o međunarodnom transferu, promjena kluba za igrače koji nisu navršili 18 godina života nije dozvoljena.

Izuzetno, svaki međunarodni transfer i svaka prva registracija maloljetnika predmet je saglasnosti potkomiteta kojeg je imenovao FIFA Komitet za status igrača u tu svrhu. Aplikaciju za saglasnost treba podnijeti asocijacija koja želi registrovati igrača. Prethodna asocijacija će imati priliku da dostavi svoje izjašnjenje. Saglasnost potkomiteta treba pribaviti prije bilo kakvog zahtjeva asocijacije za izdavanje Certifikata o međunarodnom transferu i/ili prve registracije. Disciplinski komitet će sankcionisati svako kršenje ove odredbe u skladu sa FIFAinim Disciplinskim pravilnikom. Pored asocijacije koja potkomitetu nije podnijela zahtjev za saglasnost, sankcije mogu biti izrečene i prethodnoj asocijaciji za izdavanje Certifikata o međunarodnom transferu bez saglasnosti potkomiteta, kao i klubovima koji su se dogovorili o transferu maloljetnog igrača.

Postupak aplikacije za prvu registraciju i certifikat o međunarodnom transferu maloljetnog igrača je slijedeći:

1. Klub koji želi da registruje igrača u skladu sa gore navedenim, obraća se administraciji NS / FS BiH, i dostavlja zahtjev za potražnju međunarodnog certifikata o transferu igrača, na za to predviđenom obrascu, PUTEF FAXA
2. Uz gore pomenuti zahtjev, klub treba dostaviti i slijedeće dokumente (U ELEKTRONSKOJ FORMI – PDF FORMATU), u originalu i sa prevodom na jedan od službenih jezika FIFA-e, i to:
 - dokaz o identitetu i državljanstvu igrača
 - dokaz o identitetu i državljanstvu oba igračeva roditelja
 - dokaz o datumu rođenja (rodni list) – igrač
 - ugovor o radu – igrač
 - ugovor o radu – igračevi roditelji
 - radna dozvola – igrač
 - radna dozvola – igračevi roditelji
 - dokaz o boravištu – igrač
 - dokaz o boravištu – igračevi roditelji
 - dokumentacija o školskoj spremi – obrazovanju
 - dokumentacija o nogometnom obrazovanju
 - dokumentacija o smještaju – zbrinjavanju
 - roditeljska saglasnost
 - Dokaz o udaljenosti: pravilo 50 km

Aplikacija će biti samo obrađena ukoliko su podneseni svi obavezni dokumenti.

Zahtjev za promjenu kluba po osnovu prethodnog stava podnosi se u registracionom periodu, s tim da se i registracija po ovom osnovu može izvršiti u registracionom periodu.

Ukoliko se radi o transferu maloljetnog igrača unutar BiH, primjenjuju se odredbe ovog Pravilnika koje se odnose na transfere punoljetnih igrača.

Član 46

Ukoliko klub ne poštuje odredbe o registraciji igrača koji nisu navršili 18 godina života, snosit će disciplinske posljedice u skladu sa odredbama Disciplinskog pravilnika NS/FS BiH.

Ukoliko su u pitanju zastupnici igrača uključeni u registraciju ili zahtjev za registraciju igrača mlađih od 18. godina i ukoliko ne poštuju Kodeks ponašanja zastupnika igrača, snosit će sankcije koje izriče Komisija za status igrača NS/FS BiH, u skladu sa Pravilnikom o zastupnicima igrača NS/FS BiH.

15 Registracija igrača koji dolaze iz inostranih klubova

Član 47

Registracija igrača koji dolaze iz inostranih klubova može se izvršiti nakon dobijanja certifikata, u skladu sa odredbama ovog Pravilnika.

Igrači strani državljanji prije registracije za klub, moraju nadležnom registracionom savezu dostaviti radnu i boravišnu dozvolu na teritoriji BiH. Registracioni savez može izvršiti registraciju takvog igrača i uz dostavljanje dokaza da

je nadležnom državnom organu podnesen zahtjev za izdavanje boravišne i radne dozvole, ali igrač ima pravo nastupa za klub tek po dobijanju navedenih dozvola.

Izuzetno, prethodni stav primjenjuje se po isteku 3 mjeseca od dana objavljivanja ovog Pravilnika u Službenom glasniku NS/FS BiH.

Klub može imati više registrovanih igrača stranih državljana, s tim što najviše šest igrača stranih državljana mogu biti upisani u zapisnik i imaju pravo nastupa na jednoj utakmici.

16 Objava registracije

Član 48

Registracija igrača klubova Premijer lige BiH objavljuje se u Službenom glasniku NS/FS BiH.

Udruženi članovi utvrđuju način objavljivanja registracije za ostale igrače.

Službeni glasnik svakog od saveza se može štampati ili objavljivati na web stranici datog saveza. Oba načina objave imaju jednako pravno dejstvo.

Član 49

Tekst za objavu registracije, sa dokazom o uplaćenju taksi za objavu u Službenom glasniku NS/FS BiH, nadležni savez za registraciju može dostaviti najkasnije do srijede, do 12 sati, za broj koji izlazi petkom.

Kasnije dostavljene prijave za registraciju objaviće se u narednom broju od kada teče i pravo nastupa igrača.

Kod registracije igrača iz inostranstva, registracionom savezu se, uz ostalu dokumentaciju, obavezno dostavlja i kopija ITC-a. Da bi igrač iz inostranstva imao pravo nastupa u narednom prvenstvenom kolu za klub koji ga želi registrovati, ITC za istoga mora biti zaprimljen najkasnije do utorka do 17:00 sati.

Član 50

Redovni broj Službenog glasnika NS/FS BiH izlazi jednom sedmično i to svakog petka, odnosno u roku koji odredi Izvršni odbor NS/FS BiH, a vanredni broj po potrebi.

Član 51

U slučaju neblagovremenog izlaska iz štampe Službenog glasnika NS/FS BiH smatrat će se da su ispunjeni uslovi za objavu registracije, ako se utvrdi da je tekst za objavu registracija predat u roku koji obezbeđuje prijem teksta objave u redakciju Službenog glasnika do utvrđenog vremena.

Registracija koja ne bude objavljena, a utvrdi se da je tekst za objavu registracija blagovremeno dostavljen, biće objavljen u narednom broju, sa napomenom da važi od dana kada je registracija trebala biti objavljena.

Član 52

Objava registracija izvršenih u registracionom periodu vrši se najkasnije 7 dana od posljednjeg dana prelaznog roka, a spisak preregistrovanih igrača najkasnije 15 dana od posljednjeg dana iz odluke o preregistraciji igrača.

Izuzetno od predhodnog stava, registracija može biti objavljena i poslije ovog roka, ako se utvrdi da je zahtjev za registraciju sa potrebnom dokumentacijom ili

zahtjev za certifikat podnijet u registracionom periodu, a registracija do tog datuma nije izvršena ili objavljena bez krivnje kluba.

Za registraciju igrača iz prethodnog stava važe odredbe za registraciju igrača u registracionom periodu, sa datumom sjednice na kojoj je registracija izvršena.

17 Pravo nastupa

Član 53

Igrač stiče pravo nastupa na prijateljskim utakmicama danom registracije, a na prvenstvenim i kup utakmicama danom objave registracije. Igrač koji dolazi iz inostranstva ima pravo nastupa za svoj klub ukoliko je ITC za istoga zaprimljen najkasnije u utorak do 17:00 sati.

Igrač koji je registrovan za klub do kraja prelaznog roka ima pravo nastupa za taj klub danom objave registracije u službenom glasniku, bez obzira da li je nastupao za drugi klub u bilo kojem rangu takmičenja, u istoj takmičarskoj polusezoni.

Igrač nema pravo nastupa za novi klub u istom ciklusu kup takmičenja za čiju organizaciju je nadležan jedan savez.

Član 54

Pravo nastupa danom objave registracije imaju igrači koji se u registracionom periodu registruju u skladu sa odredbama ovog Pravilnika po slijedećim osnovama:

1. Ukoliko se registruju prvi put;
2. Ukoliko dolaze iz domaćeg kluba;
3. Ukoliko dolaze iz inostranog kluba;
4. Ukoliko dolazi iz inostranog kluba i registruju se privremeno;
5. Ukoliko se registruju po osnovu ustupanja.
6. Ukoliko se radi o igračima amaterima klubova koji su odustali od takmičenja
7. Ukoliko se radi o igraču koji nije preregistrovan.

Član 55

Pravo nastupa danom objave registracije imaju igrači koji se registruju izvan registracionog perioda, u skladu sa odredbama ovog Pravilnika, po slijedećim osnovama:

1. Ukoliko je istekao profesionalni ugovor sa domaćim klubom prije završetka registracionog perioda;
2. Ukoliko je istekao profesionalni ugovor sa inostranim klubom prije završetka registracionog perioda.
3. Ukoliko je istekao amaterski ugovor sa domaćim klubom prije završetka registracionog perioda;
4. Ukoliko je istekao amaterski ugovor sa inostranim klubom prije završetka registracionog perioda;
5. Ukoliko je igrač amater bez ugovora dobio ispinicu kluba prije završetka registracionog perioda;
6. Ukoliko se igrač registruje prvi put
7. Ukoliko se radi o igraču profesionalcu koji nije preregistrovan
8. Ukoliko se radi o igraču amateru koji nije preregistrovan, a u skladu sa čl. 29. Pravilnika

Član 56

U slučaju da je objavljena registracija osporena pismenim prigovorom u roku utvrđenom za ulaganje prigovora, pa se pravosnažnom odlukom utvrdi da je prigovor osnovan, registracija se poništava, a klub koji je izvršio nepravilnu registraciju snosi takmičarske i disciplinske posljedice, a odgovorna lica u klubu i savezu koja su znala ili trebala znati da nije bilo uslova za registraciju igrača, biće disciplinski sankcionisana.

Član 57

U slučajevima kada se ustanovi da je igrač registrovan suprotno odredbama ovog Pravilnika, a takvo saznanje se stekne poslije roka za ulaganje prigovora za registraciju, registracija ostaje na snazi kao punovažni akt, s tim što će odgovorna lica kluba i saveza koja su takvu registraciju omogućila biti disciplinski sankcionisana, a takmičarski rezultati ostaju nepromijenjeni.

Član 58

Ukoliko igrač koji nije registrovan za klub, ili igra prije objave registracije na zvaničnoj utakmici, klub će snositi takmičarske posljedice, kao i disciplinske sankcije.

Član 59

Disciplinske sankcije u smislu ovog Pravilnika su propisane Disciplinskim pravilnikom NS/FS BiH.

18 Preregistracija

Član 60

U cilju ažuriranja kartoteke registrovanih igrača, izvršni odbor nadležnog saveza za registraciju može donijeti odluku da se izvrši preregistracija svih registrovanih igrača na svom području.

Odluka o preregistraciji igrača objavljuje se u Službenom glasniku NS/FS BiH i službenim glasnicima nadležnih saveza za registraciju, najkasnije 15 dana prije početka registracije.

Preregistracija se vrši prema potrebi, ali u pravilu za period ne kraači od pet godina.

Preregistracija se vrši u skladu sa odlukom o načinu preregistracije igrača koju donosi Izvršni odbor NS/FS BiH, a koja je sastavni dio ovog Pravilnika.

V STATUS IGRAČA

Član 61

Igrači koji učestvuju u organizovanom nogometu/fudbalu u okviru NS/FS BiH su po svom statusu amateri ili profesionalci.

Klubovi Premijer lige moraju imati sa igračima zaključene profesionalne Ugovore, izuzetno klubovi Premijer lige mogu zaključiti amaterske ugovore sa najviše jedanaest igrača.

Klubovi Prvih liga moraju imati sa igračima zaključene profesionalne ili amaterske ugovore.

Klubovi Drugih liga moraju imati sa igračima zaključene amaterske ugovore.

Klubovi nižih stepena od gore navedenih mogu sa igračima koji su članovi njihovog kluba zaključiti amaterske ugovore.

Postojanje ugovora između klubova Premijer, Prve i Druge lige sa igračima članovima kluba predstavlja uslov za nastupanje fudbalera na prvenstvenim i kup utakmicama.

1 Igrači amateri

Član 62

Igrač amater je igrač koji se bavi nogometom/fudbalom bez naknade.

Član 63

Igrač amater u pravilu se registruje za klub bez zaključivanja ugovora sa klubom.

Izuzetno, igrač amater i klub mogu zaključiti amaterski ugovor, ako odluče da ugovore posebne uslove pod kojima igrač nastupa, kao što su stipendija za školovanje, hranarina i drugo, a u skladu sa čl. 61 ovog Pravilnika.

Član 64

Amaterski ugovori zaključuju se i raskidaju prema proceduri propisanoj za profesionalne ugovore, u skladu sa odredbama članova 77, 80, 82, 84. i 86. ovog Pravilnika.

Sporazumni raskidi amaterskih ugovora mogu se vršiti tokom cijelog trajanja takmičarske sezone, dok je raskid amaterskih ugovora po svim drugim osnovama dozvoljen samo u registracionim periodima.

Član 65

Za igrače amatere koji zaključe ugovor sa klubom primjenjuju se odredbe ovog Pravilnika koje se odnose na ostale igrače amatere, kada su u pitanju registracioni rokovi i druge odredbe koje se odnose na amatere.

Izuzetno, igrač amater koji je zaključio ugovor s klubom ne može biti registrovan za novi klub dok mu traje ugovorna obaveza.

Igrač koji je navršio 14 godina može zaključiti amaterski ugovor na jednu godinu, ukoliko se ugovor zaključuje u ljetnom registracionom periodu.

Amaterski ugovor se može zaključiti i tokom takmičarske godine i u tom slučaju traje do kraja tekuće takmičarske godine.

Član 66

Igraču amateru koji ima ugovor s klubom ugovor se može raskinuti sporazumno, ili iz opravdanih razloga, kao i iz opravdanih sportskih razloga, prema proceduri propisanoj za profesionalni ugovor.

Igrač amater kojem je ugovor raskinut iz razloga navedenih u prethodnom stavu može biti registrovan za novi klub samo u registracionom periodu.

Amaterski ugovor ne može se jednostrano raskinuti u toku trajanja takmičarske godine.

Član 67

Klub je prema finansijskim mogućnostima dužan igraču amateru obezbijediti uslove za treniranje, opremu, terene, objekte, trenere, te nadoknaditi igraču sve troškove vezano za putovanja na utakmice (troškovi puta, ishrana, prenoćište).

Klub je obavezan igrača amatera osigurati od povreda, invalidnosti i smrtnog slučaja.

Klub može igraču amateru obezbijediti i pojačanu ishranu.

Član 68

Igrač koji je registrovan kao profesionalni igrač, a želi da igra nogomet/fudbal kao amater, može biti registrovan kao amater samo u registracionom periodu i to po isteku najmanje 30 dana od zadnjeg nastupa za klub kao profesionalac, ukoliko je profesionalni ugovor raskinut sporazumno, ili ako je profesionalni ugovor raskinut iz opravdanog razloga, ili iz sportski opravdanog razloga.

2 Profesionalni igrači

Član 69

Profesionalni igrač je igrač koji ima pismeni ugovor o radu sa klubom i koji se bavi nogometom/fudbalom, kao svojim zanimanjem, za platu i druge ugovorom utvrđene naknade.

Igrač sa profesionalnim ugovorom ima status radnika u radnom odnosu i mora biti od strane kluba osiguran za sve vrste povreda, invaliditeta, smrti, a koje su posljedica igranja utakmice, treniranja, kao i za slučajeve koji su se desila na putovanjima na utakmice i treninge i sa utakmica i treninga.

3 Zaključivanje ugovora sa profesionalnim igračima

Član 70

Sa igračom koji je odabrao igranje nogometa/fudbala kao svoju profesiju obavezno se zaključuju ugovori.

Član 71

Ugovor igrača i kluba zaključuje se u skladu sa odredbama ovog Pravilnika i FIFA Pravilnika o statusu i transferu igrača.

Profesionalne ugovore sa igračima mogu zaključivati klubovi Premijer lige, klubovi Prve lige Federacije BiH i Prve lige Republike Srpske.

Klubovi ostalih liga mogu zaključivati amaterske ugovore pod uslovima iz ovog Pravilnika, a u skladu sa čl. 61. ovog Pravilnika.

Član 72

Ugovor potpisuju igrač, predstavnik kluba i predstavnik registracionog saveza.

Sve vrste ugovora se potpisuju u sjedištu nadležnog registracionog saveza.

Član 73

Ugovor igrača koji nije navršio 18 godina života na dan potpisivanja ugovora potpisuje pored igrača i roditelj ili staratelj igrača, predstavnik kluba i predstavnik kluba registracionog saveza.

Ugovor se ovjerava pečatom kluba i pečatom saveza, a zaključuje se u četiri primjeraka.

Član 74

Ugovor se može zaključiti najmanje na godinu dana, a u maksimalnom trajanju od pet godina.

Sa igračem mlađim od 18 godina života ugovor se može zaključiti najduže na tri godine.

Sa igračem mlađim od 16 godina ne može se zaključiti profesionalni ugovor ni pod kojim uslovima.

Član 75

Verifikaciju ugovora i aneksa ugovora, te sporazumne raskide i produženje ugovora igrača klubova Premijer lige, vrši Komisija za verifikaciju NS/FS BiH, a ostale ugovore verifikuju nadležne komisije udruženih članova NS/FS BiH.

Udruženi članovi su obavezni primjerak svih profesionalnih ugovora dostaviti u Sekretarijat NS/FS BiH.

Član 76

Sekretarijat NS/FS BiH vodi registar svih profesionalnih ugovora.

Član 77

Potpis stavljen na Ugovor ne može se jednostrano povući.

Ugovor stupa na snagu danom verifikacije u nadležnom savezu za verifikaciju.

Član 78

Ugovori koji nisu verifikovani u nadležnom savezu nemaju pravnu zaštitu od strane organa saveza.

Član 79

Ugovorom između igrača i kluba kao i aneksom ugovora utvrđuju se međusobni odnosi, obaveze kluba prema igraču, obaveze igrača prema klubu i druge odredbe koje su dogovorene između kluba i igrača.

Član 80

Ugovor ne može sadržavati odredbe koje su suprotne ovom Pravilniku i FIFA Pravilniku o status i transferu igrača.

Odredbe u ugovoru koje su suprotne odredbama ovog Pravilnika i FIFA Pravilniku o status i transferu igrača smatraju se ništavnim.

Član 81

Zaključivanje ugovora i vrijeme trajanja ugovora upisuje se u legitimaciju i pasoš igrača.

Član 82

Ukoliko ugovor ističe na kraju takmičarske sezone ili polusezone, smatra se da ugovor ističe dan poslije posljednje odigrane utakmice stalnih takmičenja, sezone ili polusezone.

VI ODRŽAVANJE UGOVORNE STABILNOSTI IZMEĐU PROFESIONALNIH IGRAČA I KLUBOVA

1 Poštivanje ugovora

Član 83

Ugovor između profesionalnog igrača i kluba ne proizvodi pravno dejstvo po isteku vremena na koji je zaključen, kao i u slučaju ako je ugovor sporazumno prekinut, ili je raskinut iz opravdanih razloga, ili opravdanih sportskih razloga.

Ugovor ne može biti raskinut u toku takmičarske godine, osim u slučajevima predviđenim ovim Pravilnikom.

Član 84

Igraču profesionalcu, koji zbog povrede ne igra, ne može se jednostrano otkazati ugovor sve dok traje medicinska rehabilitacija. Takav igrač ostaje član kluba, a sve do isteka ugovora ima pravo na platu i na sva osiguranja.

Član 85

Igrač profesionalac koji odbija rehabilitaciju, ili redovne treninge, nema prava iz predhodnog člana.

Član 86

Igraču koji je proveo u klubu tri godine ili tri sezone po potpisu ugovora, zavisno od toga šta prije nastupa i ako je takav ugovor sačinjen prije navršene 28. godine života, ne može se otkazati ugovor zbog opravdanih sportskih razloga ili drugih opravdanih razloga u daljnjem trajanju od tri godine, odnosno u daljnjem trajanju od dvije godine, ako je ugovor potpisan poslije navršene 28. godine života igrača.

Ugovor u smislu ovog člana može se otkazati ako igrač odbija da izvršava ugovorne obaveze, odnosno odbija da trenira ili igra bez opravdanog razloga.

Član 87

Igrač sa profesionalnim ugovorom, koji je mlađi od 18 godina, može otkazati ugovor prije isteka roka ako se registruje za inostrani klub, a mijenja mjesto boravka zbog preseljenja porodice.

2 Sporazumni raskid ugovora

Član 88

Sporazumni raskid ugovora može se vršiti tokom takmičarske godine, a registracija igrača po ovom osnovu vrši se u registracionim periodima.

Igrači koji su izvršili sporazumni raskid profesionalnog ugovora u toku registracionog perioda, mogu izvršiti registraciju u toku takmičarske sezone, sa sticanjem prava nastupa danom objave.

3 Raskid ugovora iz opravdanih razloga

Član 89

Raskid ugovora iz opravdanih razloga, ukoliko igrač i klub ne mogu postići dogovor, odobravaju komisije za status igrača nadležnog registracionog saveza u prvom stepenu, odnosno po žalbi, u drugom stepenu, Komisija za status igrača NS/FS BiH za igrače klubova Premijer lige, a komisije za status igrača entitetskih saveza za ostale igrače.

Član 90

Opravdani razlozi za prekid ugovora su faktičke prirode, koji se cijene od slučaja do slučaja, na zahtjev igrača, odnosno kluba.

Član 91

Raskid ugovora iz opravdanih razloga, na zahtjev igrača ili kluba, ne isključuje pravo kluba da traži naknadu za treniranje, u skladu sa ovim Pravilnikom, ili odlukom Izvršnog odbora i povrat iznosa koje je igrač primio kod potpisa ugovora srazmjerno vremenu koji je preostao do isteka ugovora. Ovo se ne odnosi na plate i premije koje je igrač primao.

Raskid ugovora na zahtjev igrača iz opravdanih razloga može se tražiti u registracionom periodu.

Raskid ugovora iz opravdanih razloga može tražiti igrač i klub.

4 Raskid ugovora iz sportski opravdanih razloga

Član 92

Raskid ugovora iz sportski opravdanih razloga, ukoliko se igrač i klub ne mogu dogovoriti, odobravaju komisije za status igrača nadležnog registracionog saveza u prvom stepenu, odnosno po žalbi, u drugom stepenu, Komisija za status igrača NS/FS BiH za igrače klubova Premijer lige, a komisije za status igrača entitetskih saveza za ostale igrače.

Član 93

Raskid ugovora iz sportski opravdanih razloga mogu tražiti igrač i klub.

Kao opravdani sportski razlozi za raskid ugovora prije isteka ugovorenog roka, između ostalih opravdanih razloga koji se cijene od slučaja do slučaja, smatra se razlog vezan za broj odigranih zvaničnih utakmica za jednu sezonu.

Ako je profesionalni igrač tokom sezone odigrao manje od 10% utakmica, pri čemu se isključuje vrijeme neigranja zbog povrede, igrač kao i klub, mogu tražiti raskid ugovora prije isteka roka iz opravdanih sportskih razloga.

Član 94

Ako je ugovor raskinut na zahtjev kluba iz sportski opravdanih razloga, klub je obavezan da prema igraču ispuni obaveze koje je preuzeo ugovorom srazmjerno do dana raskida ugovora, odnosno igrač je dužan da vrati klubu iznose koje je primio za ugovoreni rok, srazmjerno vremenu koje je preostalo do isteka ugovora. Prednje navedeno se ne odnosi na plate i premije.

Raskid ugovora po ovom osnovu ne isključuje pravo kluba na naknadu za treniranje.

Član 95

Raskid profesionalnog ugovora klub ne može tražiti dok je igrač povrijeđen.

Utvrđavanje okolnosti da li igrač može igrati, odnosno trenirati u vezi ostvarivanja prava iz ovog Pravilnika utvrđuje ljekar kluba, ili druga medicinska ustanova, na zahtjev kluba.

Član 96

Ako je ugovor raskinut prije isteka ugovornog roka iz sportski opravdanog razloga na zahtjev igrača, igrač je dužan da vrati klubu iznos finansijskih sredstava koja je primio kod potpisa ugovora, srazmjerno vremenu koje je preostalo do isteka ugovorenog roka. Prednje navedeno se ne odnosi na plate i premije.

Raskid ugovora iz sportski opravdanih razloga na zahtjev igrača isključuje izricanje sportskih sankcija, a ne isključuje pravo kluba na naknade za treniranje kod daljnih transfera, u skladu sa odredbama ovog Pravilnika.

Raskid ugovora po osnovu sportski opravdanih razloga igrač može tražiti samo u roku od 15 dana nakon posljednje zvanične utakmice koji je klub odigrao u takmičarskoj sezoni, odnosno u pauzi sezone.

Član 97

Ugovor igrača profesionalca ne može biti jednostrano raskinut u toku trajanja takmičarske godine.

Raskid ugovora igrača profesionalca iz sportski opravdanih razloga može se vršiti u roku do 15 dana od dana odigravanja posljednje utakmice na kraju takmičarske godine.

Raskid ugovora igrača profesionalca iz opravdanih razloga, ili iz sportski opravdanih razloga može biti raskinut na način i u postupku predviđenim odredbama ovog Pravilnika.

Član 98

Igrač kome je raskinut ugovor iz opravdanih razloga, kao i iz sportski opravdanih razloga, može za drugi klub biti registrovan samo u registracionom periodu.

5. Posljedice prekida ugovora bez opravdanog razloga

Član 99

U slučajevima kad je ugovor raskinut jednostrano, strana koja je prekinula ugovor snosi štetne posljedice.

Član 100

U slučaju da klub jednostrano raskine ugovor bez opravdanog razloga, ili bez sportski opravdanog razloga, dužan je prema igraču ispuniti sve ugovorne obaveze do kraja isteka ugovora.

U ovaj iznos uključene su plate i druga ugovorna davanja koja bi igrač imao da je ostao član kluba.

Klub koji je isplatio igraču obeštećenje za jednostrani raskid ugovora ima pravo na naknadu za treniranje igrača, ukoliko igrač potpiše profesionalni ugovor sa drugim klubom.

Član 101

U slučaju da igrač jednostrano raskine ugovor obavezan je klubu isplatiti iznos naknade koji je primio prilikom zaključenja ugovora. Takav igrač ne može promijeniti klub dok mu ne istekne prethodni ugovor, osim u slučaju da igrač dobije ispisnicu prethodnog kluba.

Pored prednjeg, igraču koji krši ugovor mogu se izreći suspenzija i disciplinske mjere u skladu sa postojećim normativnim aktima kluba i Disciplinskog pravilnika NS/FS BiH.

Član 102

Kod jednostranog prekida ugovora od strane igrača, klub ima pravo na naknadu i obeštećenja u skladu sa ovim Pravilnikom ili u skladu sa odlukom Izvršnog odbora NS/FS BiH, ako je naknada regulisana odlukom Izvršnog odbora, kao i u skladu sa ugovorom sačinjenim između igrača i kluba, ako je ovo pitanje regulisano ugovorom.

6 Posebne odredbe u vezi sa ugovorom između profesionalnog igrača i kluba

Član 103

Klub koji namjerava zaključiti ugovor sa profesionalnim igračem mora o tome obavijestiti njegov trenutni klub u pismenoj formi prije početka pregovora sa profesionalnim igračem.

Igrač može da zaključi ugovor sa drugim klubom samo ako je njegov ugovor sa sadašnjim klubom istekao, kao i u roku od 15 dana po zaključivanju sporazumnog raskida ugovora, raskida ugovora iz opravdanih razloga, ili sportski opravdanih razloga.

Izuzetno od prethodnog stava, igrač može da zaključi ugovor sa drugim klubom i šest mjeseci prije isteka važećeg ugovora sa prethodnim klubom, s tim što se takav ugovor ne može verifikovati prije isteka ili raskida važećeg ugovora po bilo kojem osnovu, ili prije dobijanja ITC-a za igrače koji dolaze iz inostranstva.

Član 104

Klubovi mogu sa profesionalnim igračima u ugovoru utvrditi naknade i obeštećenje za prekide ugovora po raznim osnovama.

Član 105

U slučajevima suprotnim predhodnom članu primjenjivat će se odredbe FIFA Pravilnika o statusu i transferu igrača.

VII NAKNADA ZA TRENIRANJE IGRAČA

Član 106

Naknada za treniranje igrača isplatiće se klubu, odnosno klubovima kod kojih je igrač bio registrovan kao amater pri potpisu prvog profesionalnog ugovora i to na ime troškova treniranja koje su klubovi imali od 12. godine života pa do navršene 21. godine života igrača, kada se smatra da je igrač završio treniranje i to srazmjerno vremenu provedenom u klubu, odnosno u klubovima do 21. godine života.

Član 107

Kada igrač potpisuje naredne profesionalne ugovore, naknada za treniranje se isplaćuje prethodnom klubu.

Član 108

U skladu sa ciljevima naknade za treniranje i naknade troškova za treniranje i razvoj igrača koje su klub, odnosno klubovi imali za razvoj igrača, a pošto su doprinosi klubova bili različiti, ovim Pravilnikom se utvrđuju slijedeći kriteriji za izračunavanje naknade za treniranje igrača, kod potpisa prvog profesionalnog ugovora, kako slijedi:

1. Svi igrači u klubu se razvrstavaju u četiri kategorije i to:
 - igrači od navršene 12 do navršene 15 godine života,
 - igrači od navršene 16 do navršene 18 godine života,
 - igrači od navršene 18 godina do navršene 21 godine života,

Član 109

U skladu sa kategorizacijom FIFA-e, klubovi iz BiH u međunarodnim transferima igrača svrstani su u slijedeće kategorije:

1. treća kategorija: klubovi Premijer lige BiH;
2. četvrta kategorija: ostali klubovi

U transferu igrača u BiH klubovi se svrstavaju u slijedeće kategorije:

1. prva kategorija: klubovi Premijer lige BiH,
2. druga kategorija: klubovi Prve lige NS F BiH i Prve lige FS RS,
3. treća kategorija: klubovi druge lige,
4. četvrta kategorija: ostali klubovi.

Član 110

Izvršni odbor NS/FS BiH određuje naknade za treniranje po osnovu godina života i po osnovu kategorije kluba iz ovog Pravilnika u smislu kriterija iz članova 113. i 114. ovog Pravilnika.

Naknada u smislu ovog Pravilnika se izračunava na godinu dana i pola godine.

Član 111

Izvršni odbor NS/FS BiH, u odluci o visini naknade, a u smislu odredaba ovog Pravilnika, naknadu utvrđuje u rasponima po pojedinim elementima iz Pravilnika.

Pravo na naknadu u prvom stepenu utvrđuje nadležni organ registracionog saveza kluba u koji je igrač prešao, a u drugom stepenu Komisija za status igrača NS/FS BiH - za igrače klubova Premijer lige, a komisije za status igrača entitetskih saveza - za igrače klubova nižeg stepena takmičenja.

Član 112

Visina naknade utvrđena u skladu sa ovim Pravilnikom uvećava se za procenat utvrđen odlukom Izvršnog odbora za igrače koji su nastupali u reprezentativnim selekcijama NS/FS BiH.

Član 113

Zahtjev za naknadu troškova za treniranje igrača može se podnijeti u roku od dvije godine od dana nastanka prava na istu.

VIII MEHANIZAM SOLIDARNOSTI

1. Solidarni doprinos

Član 114

Ukoliko igrač profesionalac izvrši transfer u toku trajanja ugovora, iznos od 5% bilo koje naknade, izuzimajući naknadu za treniranje plaćene prethodnom klubu, odbiće se od ukupnog iznosa ove naknade i novi klub će ga preraspodijeliti, kao solidarni doprinos klubu/klubovima koji su godinama bili uključeni u treniranje i obrazovanje igrača. Ovaj doprinos solidarnosti će odražavati broj godina (izračunato proporcionalno ako se radi o manje od jedne godine) u kojima je bio registrovan kod relevantnog kluba/klubova, između sezona svog 12. i 21. rođendana, prema kategorizaciji FIFA-e.

Iznos po osnovu solidarnosti se isplaćuje neovisno od isplata naknada za treniranje, a obaveza traje tokom svih ugovora koje igrač potpisuje.

Klubu kojem se isplaćuje naknada, odnosno obeštećenje, ne isplaćuje se iznos po osnovu solidarnosti.

IX MEĐUNARODNI CERTIFIKATI O TRANSFERU

1. Izdavanje certifikata za profesionalne igrače

Član 115

Igrač registrovan za klub neke od asocijacija – nacionalnih saveza članica FIFA-e može biti registrovan kao igrač za klub unutar NS/FS BiH, samo kada NS/FS BiH dobije međunarodni certifikat (u daljem tekstu ITC) o transferu od prethodne asocijacije.

Član 116

Profesionalnom igraču registrovanom za klub u NS/FS BiH neće se izdati ITC ukoliko se dokaže da mu ugovor nije istekao, nije sporazumno raskinut, ili nije raskinut iz opravdanih, ili opravdanih sportskih razloga.

Odredbe iz prethodnog stava odnose se i na igrače sa amaterskim ugovorom.

Član 117

Prijavu za registraciju profesionalnog igrača po osnovu ITC-a novi klub mora podnijeti nadležnom savezu tokom jednog od dva registraciona perioda utvrđena od strane NS/FS BiH, izuzev ako ne ispunjava uslove iz čl. 44 ovog Pravilnika. Uz prijavu će morati biti priložena kopija ugovora između kluba i igrača.

Član 118

Profesionalni igrač nema pravo nastupa na zvaničnim utakmicama svog novog kluba, dok prethodni nacionalni savez ne izda ITC.

Po prijemu zahtjeva kluba, NS/FS BiH će odmah, a najkasnije u roku od tri dana zatražiti od prethodnog saveza da izda ITC za profesionalnog igrača.

Kod potraživanja ITC-a za profesionalne igrače, primjenjuje se Anex 3 FIFA Pravilnika o statusu i transferu igrača (FIFA TMS Sistem).

Posljednji dan kad se može tražiti ITC je zadnji dan registracionog perioda utvrđenog u NS/FS BiH. Izuzetno, ITC se može tražiti i nakon isteka registracionog perioda za igrače koji su slobodni u registracionom periodu (odnosno za igrače za koje se primjenjuje čl. 44)

U slučaju da u NS/FS BiH bude dostavljen ITC od drugog nacionalnog saveza, a da NS/FS BiH nije tražio ITC, igrač ne može biti registrovan za klub na teritoriji BiH.

Član 119

Izuzetno, u slučaju da NS/FS BiH ne primi odgovor na zahtjev za izdavanje ITC u roku od 30 dana od dana podnesenog zahtjeva, profesionalni igrač će biti registrovan za novi klub na privremenoj osnovi (privremena registracija).

Privremena registracija će važiti godinu dana, računajući od dana podnesenog zahtjeva.

Igrač registrovan po osnovu privremene registracije ne može potpisati profesionalni ili amaterski ugovor u vrijeme trajanja privremene registracije.

Privremena registracija postaje trajna ukoliko certifikat ili valjani razlozi za neizdavanje certifikata nisu dostavljeni tokom jedne godine, računajući od dana podnesenog zahtjeva.

Odredba iz prethodnog stava se odnosi jednako na profesionalne igrače i igrače amatere.

Član 120

Privremenu registraciju tokom njenog trajanja Komitet za status igrača FIFA-e može povući ako prethodni nacionalni savez podnese valjane razloge zbog kojih nije odgovorio na zahtjev za izdavanje ITC-a.

U slučajevima iz prethodnog stava, klub nema sportskih posljedica za utakmice odigrane sa igračem sa privremenom registracijom.

Član 121

U slučaju da je igrač jednostrano raskinuo ugovor, ne može se podnijeti zahtjev za ITC do isteka roka na koji je prethodni ugovor zaključen, osim u slučaju da igrač dobije ispisnicu prethodnog kluba.

Član 122

Navedena pravila u predhodnim članovima u vezi izdavanja ITC-a za profesionalne igrače jednako se odnose i na igrača koji zadobija status amatera.

Član 123

Prilikom izdavanja ITC-a za igrače profesionalce, NS/FS BiH će uz ITC priložiti i pasoš igrača.

Član 124

Po prijemu zahtjeva za izdavanje certifikata NS/FS BiH će, nakon što prethodno zatraži očitovanje kluba u kojem je nastupao igrač za koji je zatražen ITC, u roku od sedam dana izdati ITC, ili će obavijestiti nacionalni savez koji traži ITC o razlozima neizdavanja ITC-a.

Član 125

Za sve odredbe koje nisu predviđene ovim Pravilnikom mjerodavan je FIFA Pravilnik o statusu i transferu igrača.

X RJEŠAVANJE SPOROVA

1 Sporovi u vezi sa registracijom igrača

Član 126

Protiv svake registracije može se izjaviti pismeni prigovor nadležnom savezu za registraciju.

Prigovor mogu izjaviti svi članovi i sve organizacije NS/FS BiH.

Prigovor ne utiče na pravo nastupa igrača do pravosnažne odluke.

Ukoliko prigovor nije podnesen u blagovremenom roku, ili ukoliko je prigovor odbijen, registracija ostaje na snazi.

Član 127

Rok za izjavu prigovora je osam dana, računajući od dana objave registracije u odgovarajućem službenom glasniku.

Uz prigovor se dostavlja i dokaz o uplati takse.

Prigovori se ulažu registracionom organu nadležnog saveza.

Pri ocjeni blagovremenosti prigovora u obzir se uzima datum preporučenog pisma – poštanskog žiga, ili dan neposrednog uručenja.

Član 128

Registracioni organ dužan je odluku o prigovoru donijeti u roku od osam dana po prijemu žalbe. Odluka po prigovoru dostavlja se zainteresovanim stranama u pismenoj formi sa obrazloženjem.

Ukoliko registracioni organ ne postupi u smislu predhodnog stava smatrat će se da je prigovor odbijen.

Član 129

Na odluku donijetu po prigovoru na registraciju, ili ako odluka u prvom stepenu nije donijeta u propisanom roku, nezadovoljna strana ima pravo uložiti žalbu drugostepenom organu u roku od 15 dana od prijema odluke donijete po prigovoru, odnosno od dana kada je trebala biti donijeta odluka prvostepenog organa.

Za igrače koji se registruju za klubove Premijer lige i sporove u vezi sa registracijom igrača klubova iz različitih entitetskih saveza, žalba na prvostepenu odluku se podnosi Komisiji za status igrača NS/FS BiH.

Za ostale slučajeve žalba se podnosi komisiji za status igrača nadležnog entitetskog saveza.

Uz žalbu se uplaćuje taksa.

Drugostepeni organ po žalbi odluku donosi u roku od 30 dana od dana prijema žalbe.

Odluka drugostepenog organa je konačna i ne može se pobijati pred nadležnim arbitražnim sudom, ali se u cilju ispitivanja njene zakonitosti nadležnom izvršnom odboru može podnijeti zahtjev za zaštitu Pravidnika.

Član 130

Registracija će biti poništena ili ispravljena kada registracioni organ utvrdi da je žalba osnovana.

Registracija će biti poništena ako se na osnovu priloženih dokumenata utvrdi da igrač nije ispunjavao uslove za registraciju, a igrač ostaje član dosadašnjeg kluba sa pravom nastupa koji je imao u tom klubu.

Registracija će biti ispravljena ako se utvrdi da igrač ispunjava uslove za provođenje registracije, ali da nije primijenjen odgovarajući član ovog Pravilnika i igrač ima pravo nastupa po izvršenoj registraciji.

Odluka o poništenju, odnosno ispravci registracije objavljuje se u službenom glasniku nadležnog saveza.

Član 131

Ako dva ili više klubova podnesu dokumentaciju za registraciju istog igrača, registracioni organ će izvršiti registraciju igrača za onaj klub za koji je igrač vremenski prije potpisao prijavu, a pravo nastupa teče od dana objave registracije.

Član 132

Ukoliko je igrač potpisao prijavu za dva ili više klubova protiv igrača i kluba za koji je potpisao naknadnu prijavu biće preduzete disciplinske mjere prema odredbama Disciplinskog pravilnika NS/FS BiH.

2 Zahtjev za zaštitu zakonitosti Pravilnika po registracijama

Član 133

Protiv odluke drugostepenog organa, ili ako drugostepeni organ nije uzeo u postupak žalbu za rješavanje u roku određenom ovim Pravilnikom, može se podnijeti prijedlog za podizanje zahtjeva za zaštitu zakonitosti ovog Pravilnika.

Prijedlog za podizanje zahtjeva za zaštitu zakonitosti podnosi se u roku od 15 dana od dana dostave drugostepene odluke, ili po proteku roka u kome drugostepeni organ treba da riješi žalbu.

Prijedlog se podnosi pismeno preko organa koji je donio konačnu odluku, a isti će prijedlog sa predmetnim spisom dostaviti komisiji za propise nadležnog saveza u roku od tri dana po prijemu predloga.

Član 134

Pravni komitet NS/FS BiH može podići zahtjev za zaštitu Pravilnika, kada se registracija odnosi na igrače za klubove Premijer lige, kao i u slučaju kada se radi o sporu klubova iz različitih entitetskih saveza.

Komisije za propise članova NS/FS BiH mogu podići zahtjeve za zaštitu zakonitosti kada se radi o registracijama igrača za klubove onih stepena takmičenja kojima rukovode ti članovi, odnosno njihove članice Područni/Kantonalni/Županijski fudbalski savezi.

Član 135

Zahtjev za zaštitu zakonitosti rješava Izvršni odbor NS/FS BiH za igrače klubova Premijer lige i za igrače u sporovima koji se odnose na klubove različitih entiteta, a u ostalim slučajevima o zahtjevu za zaštitu zakonitosti Pravilnika odlučuju izvršni odbori entitetskih saveza.

Član 136

Ukoliko nadležna komisija za propise ne prihvati prijedlog da se podnese zahtjev za zaštitu zakonitosti Pravilnika, podnosilac prijedloga može izravno podnijeti zahtjev za zaštitu zakonitosti Pravilnika nadležnom izvršnom odboru.

Član 137

Ukoliko nadležni organ postupajući po Zahtjevu za zaštitu zakonitosti ukine odluku i vrati je na ponovno razmatranje, rok je 15 dana za postupanje po datom zahtjevu.

Ako nadležni organ ukine pravosnažnu odluku i vrati je na ponovno razmatranje nadležnom organu, ovaj je dužan da izvede radnje i da raspravi pitanja na koja mu je ukazao nadležni organ.

U slučaju kada određeni organ ne postupi po primjedbama nadležnog organa ili ih neobavi u predviđenom roku, nadležni Izvršni odbor će po službenoj dužnosti donijeti konačnu odluku najkasnije u roku od 30 dana od dana kada je istekao rok postupanja nadležnog organa.

3 Sporovi u vezi sa ugovorima

Član 138

Sporove koji nastaju u vezi sa ugovorima, na pismeni zahtjev ugovornih strana, u prvom stepenu rješava nadležni organ saveza za registraciju, a u drugom stepenu Komisija za status igrača NS/FS BiH za igrače klubova Premijer lige, odnosno komisije za status igrača entitetskih saveza za igrače nižeg stepena takmičenja.

Nezadovoljna ugovorna strana može podnijeti prvostepenom organu zahtjev za zaštitu svojih prava u roku od 30 dana po saznanju za štetni događaj.

Na odluku prvostepenog organa nezadovoljna ugovorna strana može uložiti žalbu drugostepenom organu, u roku od osam dana od prijema prvostepene odluke.

Član 139

Ukoliko prvostepeni organ nije postupio po zahtjevu stranke u roku od 30 dana po izjavljenoj žalbi, nezadovoljna strana može izjaviti žalbu drugostepenom organu u daljnjem roku od osam dana, računajući od dana kad je trebalo biti odlučeno po podnijetoj žalbi.

Drugostepeni organ je dužan donijeti odluku po žalbi u roku do 30 dana od dana podnošenja žalbe.

Prvostepena odluka se smatra pravosnažnom ukoliko su se sporne strane pismeno odrekle žalbe.

Na odluku drugostepenog organa može se podnijeti žalba Arbitražnom sudu sporta u Lozani (CAS).

4 Rješavanje sporova po osnovu zahtjeva za treniranje igrača

Član 140

Sporovi u vezi naknade za treniranje igrača koji su registrovani za klubove Premijer lige u prvom stepenu rješava nadležni organ saveza za registraciju kluba u koji je igrač prešao, a u drugom stepenu Komisija za status igrača NS/FS BiH.

Sporove u vezi naknade za treniranje igrača koji se registruju za klubove ostalih stepena takmičenja u prvom stepenu rješava nadležni organ saveza za registraciju kluba u koji je igrač prešao, a u drugom stepenu komisije za status igrača entitetskih saveza.

Član 141

Zahtjevi u prvom stepenu se rješavaju u roku od 30 dana od dana prijema zahtjeva.

Član 142

Na odluku prvostepenog organa nezadovoljna strana može uložiti žalbu drugostepenom organu u roku od 15 dana od dana prijema prvostepene odluke.

Žalbe u drugom stepenu se rješavaju u roku od 30 dana od dana prijema žalbe.

Član 143

Na odluku drugostepenog organa može se podnijeti žalba Arbitražnom sudu sporta u Lozani (CAS).

Član 144

Ukoliko su u sporove u naknadi za treniranje mladih igrača uključeni zastupnici igrača i ne poštuju Kodeks ponašanja zastupnika igrača, snosit će sankcije koje izriče Komisija za status igrača NS/FS BiH, u skladu sa Pravilnikom o zastupnicima igrača NS/FS BiH.

5 Sporovi igrača i zastupnika igrača

Član 145

Sporove između igrača i zastupnika igrača u prvom stepenu rješava Komisija za status igrača NS/FS BiH, u roku od 30 dana od dana prijema zahtjeva.

Na odluku prvostepenog organa nezadovoljna strana može uložiti žalbu Apelacionoj komisiji NS/FS BiH, u roku od 15 dana od dana prijema odluke.

Apelaciona komisija rješava žalbu u roku od 30 dana od dana prijema žalbe.

Na odluku drugostepenog organa nezadovoljna strana može podnijeti tužbu Arbitražnom sudu sporta u Lozani (CAS).

XI ODREDBE O FUTSALU

Član 146

Ako ovim Pravilnikom ili FIFA Pravilnikom o status i transferu igrača nije drugačije određeno za pojedine odnose, odredbe ovog Pravilnika primjenjuju se na klubove i igrače za futsal.

Član 147

Igrači u futsalu su po pravilu amateri i igraju nogomet/fudbal bez naknade.

Član 148

Za igrače futsala ne primjenjuju se odredbe ovog Pravilnika koje se odnose na registracione periode, pravo na naknadu za treniranje igrača, kao i pravo na doprinos solidarnosti. IO NS/FS BiH će posebno utvrditi prelazne rokove za ovu kategoriju igrača.

Član 149

Igrač registrovan za veliki nogomet/fudbal može biti registrovan i za klub u futsalu.

XII ODREDBE O ŽENSKOM NOGOMETU/FUDBALU

Član 150

Ako ovim Pravilnikom ili FIFA Pravilnikom o status i transferu igrača nije drugačije određeno za pojedine odnose, odredbe ovog Pravilnika primjenjuju se na klubove i igrače za mali nogomet/fudbal.

Član 151

Odredbe ovog Pravilnika o naknadi za treniranje ne primjenjuju se na ženski nogomet/fudbal.

Izvršni odbor NS/FS BiH može svojom odlukom utvrditi posebne uslove u vezi naknade za treniranje igrača u ženskom nogometu/fudbalu.

XIII TAKSE

Član 152

Visinu naknade za registraciju igrača, članarine za igrače, trenere, sudije i kontrolore suđenja i dr., kao i visinu taksi za žalbe i zahtjeve za rješavanje sporova u entitetskim i registracionim savezima određuju ti savezi, s tim da se visina naknada za registraciju igrača donosi u skladu sa odlukom Izvršnom odbora NS/FS BiH.

Član 153

Za rješavanje svih vrsta sporova koje rješavaju organi nadležnog saveza za registraciju prilaže se dokaz o uplaćenju propisanoj taksi, čiju visinu određuje izvršni organ nadležnog saveza za registraciju.

Visinu takse za rješavanje svih vrsta sporova i žalbi, koje rješavaju organi NS/FS BiH, kao i za objave u Službenom glasniku NS/FS BiH utvrđuje Izvršni odbor NS/FS BiH.

Uz zahtjev za rješavanje sporova, žalbi, izdavanje dokumentacije, kao i objave u Službenom glasniku NS/FS BiH, dostavlja se dokaz o uplaćenju taksi.

XIV PRELAZNE I ZAVRŠNE ODREDBE

Član 154

Ovaj Pravilnik stupa na snagu i primjenjuje se osam dana od dana objave u Službenom glasniku NS/FS BiH. Stupanjem na snagu ovog Pravilnika prestaju da važe odredbe Pravilnika o registraciji klubova i igrača, transferu i statusu igrača NS/FS BiH, usvojenog na sjednici Izvršnog odbora NS/FS BiH, održanoj 21.12.2010. godine.

Sporovi koji su započeti, a nisu riješeni do stupanja na snagu ovog Pravilnika će se rješavati prema odredbama Pravilnika usvojenog 21. 12. 2010.godine.

Član 155

Sporovi koji su nastali primjenom propisa i odluka nadležnih organa NS/FS BiH, koji su važili prije stupanja na snagu ovog Pravilnika, rješavaće se po odredbama prethodnog Pravilnika i odluka donijetih do stupanja na snagu ovog Pravilnika.

Član 156

Ako je posljednji dan svih rokova utvrđenim ovim Pravilnikom nedjelja ili državni praznik, taj rok se produžava za prvi naredni radni dan.

Član 157

Ugovori zaključeni prije stupanja na snagu ovog Pravilnika su važeći.

Član 158

Ugovori zaključeni po stupanju ovog Pravilnika, a koji su suprotni ovom Pravilniku, ili su suprotni obaveznim propisima u pravnom sistemu BiH, odnosno entiteta, smatrat će se ništavnim.

Član 159

Sva sporna pitanja iz ovog Pravilnika će se rješavati po odredbama ovog Pravilnika, u skladu sa Statutom NS/FS BiH i Pravilnicima FIFA-e.

U slučaju neusklađenosti ovog Pravilnika i FIFA Pravilnika o statusu i transferu igrača primjenjuju se odredbe FIFA Pravilnika o statusu i transferu.

Član 160

Sve što nije regulisano ovim Pravilnikom, rješavat će odlukama izvršnog odbora u skladu sa Statutom NS/FS BiH i u skladu sa odgovarajućim Pravilnikom FIFA-e.

Član 161

Pri tumačenju ovog Pravilnika mora se polaziti od slijedećih principa:

1. da se ugovori moraju poštovati;
2. da ugovori mogu biti raskinuti u slučaju opravdanog razloga i u slučaju opravdanih sportskih razloga, bez posljedica disciplinskog karaktera, uz mogućnos plaćanja naknada i obeštećenja sa ovim pravilnikom uz uvažavanja principa i jednakog davanja;
3. da se ugovori ne mogu raskinuti za vrijeme trajanja sezone;
4. da kod jednostranog raskida ugovora štetne posljedice snosi strana koja je ugovor raskinula;
5. da se igraču ne može raskinuti ugovor dok traje medicinska rehabilitacija;
6. da se obavezna naknada plaća kod transfera profesionalnih igrača dok igrač ne navrši 23 godine života;
7. poslije navršene 23 godine života obeštećenje se plaća ako se ugovor raskida u toku njegovog trajanja, bez obzira na godine života igrača;
8. da opravdanost raskida ugovora cijene organi ovog saveza, odnosno entitetski savezi, ako se igrač i klub ne mogu dogovoriti;
9. da se odredbe o mehanizmu solidarnosti primjenjuju u skladu sa propisima FIFA-e;
10. da termin takmičarska sezona znači takmičarski period ljeto – zima;

11. da odredbe ovog Pravilnika može mijenjati samo izvršni odbor NS/FS BiH.

Član 162

Za autentično tumačenje ovog Pravilnika nadležan je Izvršni organ NS/FS BiH, uz prethodno mišljenje Pravnog komiteta NS/FS BiH.

PREDSJEDNIK

Ivan Osim, s.r.